



Broj: 04/5-50-15-56-13-1/17
Sarajevo, 31. 3. 2017. godine

PREDMET: Informacija sa održanog 94. Rose Roth seminara PSNATO i zasjedanja posebne grupe PSNATO za zemlje MENA Sarajevo 21.-23. 3. 2017. godine

U periodu 21.-23.3.2017.godine u Sarajevu, u Velikoj sali Parlamentarne skupštine BiH, održan je 94. Rose Roth seminar PSNATO i zasjedanje Posebne grupe PSNATO za zemlje MENA.

Seminar je organizovala PSNATO u saradnji sa PSBiH i Delegacijom PSBiH u PSNATO.

U radu seminara ispred Delegacije PSBiH u PSNATO učestvovali su Nikola Lovrinović, predsjedavajući i Asim Sarajlić, član Delegacije PSBiH u PSNATO.

Učesnicima seminara su se u skladu sa programom obratili Šefik Džaferović, predsjedavajući Predstavničkog doma PSBiH, Bariša Čolak, predsjedavajući Doma naroda PSBiH, Sifet Podžić, predsjedavajući Zajedničke komisije za odbranu i sigurnost BiH.

U radu seminara učestvovali su Safet Softić, zamjenik predsjedavajućeg Doma naroda PSBiH i Borislav Bojić, zamjenik predsjedavajućeg Zajedničke komisije za odbranu i sigurnost BiH.

Učesnicima seminara su se obratili i Mladen Ivanić, predsjedavajući Predsjedništva BiH, Denis Zvizdić, predsjedavajući Vijeća ministara BiH, Marina Pendeš, ministrica odbrane BiH, Dragan Mektić, ministar sigurnosti BiH, Josip Brkić, zamjenik ministra vanjskih poslova BiH i Nedeljko Čubrilović, predsjednik Skupštine Republike Srpske.

U radu seminara učestvovali su predstavnici 42 zemlje, od toga 19 članica PSNATO, 11 pridruženih članica PSNATO kao i 12 članica zemalja posebne grupe za zemlje MENA.

Ukupno je u radu seminara učestvovalo 152 parlamentarca, 53 eksperta i 27 prestavnika BiH institucija.

Zajednička služba PSBiH je u cijelosti i po predviđenom programu aktivnosti vrlo dobro uradila planirane aktivnosti. Vlastitim sredstvima i raspoloživim kadrom-službenicima i zaposlenicima je na vrijeme urađen sve i jedan planirani zadatak i obaveza.

Tokom seminara je organizovan prijem u Gradskoj vijećnici u Sarajevu dana 21.3.2017. godine kao i posjeta franjevačkom samostanu Duha svetog u Fojnici dana 23.3. gdje je posjećen muzej, knjižara i galerija te je pripremljen i prigodan program od strane fratara samostana za sve učesnike seminara

Prvog dana 94. Rose – Roth seminara Parlamentarne skupštine Sjevernoatlantskog saveza (PSNATO) i zasjedanja posebne grupe za Bliski istok i Mediteran PSNATO, koji je počeo sa radom 21.3.2017., 152 učesnika iz 42 zemlje svijeta diskutovali su o političkim stavovima u vezi sa punopravnim članstvom zemalja regiona Zapadnog Balkana u NATO - savezu, kao i o promovisanju razumijevanja Alijanse, te uklanjanju predrasuda u vezi s djelovanjem NATO-a.

Tokom diskusije o ovim temama, predsjedavajući Zajedničke komisije za odbranu i sigurnost BiH Sifet Podžić rekao je da u Bosni i Hercegovini postoje različita viđenja o pitanju njene integracije u NATO - savez, ali i naglasio da svi politički akteri aktivno rade na iznalaženju zajedničkih rješenja. S tim u vezi, Podžić je dodao da je Zajednička komisija za odbranu i sigurnost BiH učinila mnogo na rješavanju problema i stvaranju pretpostavki koje našu državu vode u okvir zemalja članica NATO-a. Konstatujući da je proces uknjiženja vojne imovine započeo, Podžić je izrazio uvjerenje da će aktiviranjem Akcionog plana za članstvo (MAP) biti poslana snažna podrška dosadašnjim naporima Bosne i Hercegovine na njenom putu ka članstvu u NATO - savezu. Podsjetivši na to da su domovi PSBiH 2008. godine usvojili Rezoluciju o spremnosti Bosne i Hercegovine za NATO integracije, Podžić je istakao da od predstavnika PSNATO očekuje podršku u ispunjavanju obveza koje našu zemlju vode ka europskim i euroatlantskim integracijama.

Učesnike seminara Podžić je upoznao i sa doprinosom koji je Zajednička komisija za odbranu i sigurnost dala u procesu uništavanja viška municije i minsko – eksplozivnih sredstava (MiMES), rješavanja problema u javnim nabavkama, pomoći civilnom stanovništvu tokom elementarnih nepogoda i kriznih situacija, te vojnog deminiranja.

Predsjedavajući Predsjedništva BiH Mladen Ivanić upoznao je učesnike Seminara s trenutnim političkim ambijentom u našoj zemlji u pogledu njenog napretka u saradnji sa NATO-om, te sa političkim pogledom u vezi s aktiviranjem MAP-a. Govoreći o integraciji BiH u NATO, Ivanić je naveo da ne postoji dilema o pitanju stupanja Bosne i Hercegovine u MAP, te izrazio očekivanje da će aktiviranje MAP-a dovesti do stabilizovanja sigurnosnih prilika u BiH i cijelom regionu Zapadnog Balkana. Zaključio je da je naša zemlja opredijeljena za nastavak saradnje sa NATO-om, posebno na polju učešća jedinica OSBiH u okviru programa podrške miru u Avganistanu i drugim zemljama svijeta, kao i na polju borbe protiv ISIL-a.

Ministrica odbrane BiH Marina Pendeš je navela da pristupanje Bosne i Hercegovine EU i NATO-u predstavljaju dva strateška cilja vanjske politike naše zemlje. Podsjetila je na to da Bosna i Hercegovina intenzivno radi na procesu knjiženja perspektivne vojne imovine, te istakla pozitivne trendove u vezi sa usvajanjem dokumenta „Pregled odbrane“ u Predsjedništvu BiH.

Ministrica Pendeš je izrazila očekivanje da će ovaj seminar pomoći predstavnicima PSNATO da putem interaktivnog dijaloga steknu cjelovitiju sliku o nastojanjima zemalja Zapadnog Balkana na njihovom putu euroatlantskih integracija, a posebno o vrijednosti aktiviranja MAP-a za Bosnu i Hercegovinu, koje bi, kako je rekla, bilo od velikog značaja i za samu Alijansu.

Učesnicima 94. Rose - Roth seminara PSNATO i zasjedanja Posebne grupe za Bliski istok i Mediteran PSNATO obratila se i komandantica NATO - štaba u Bosni i Hercegovini brigadna generalica Giselle Willz, a svoja stajališta prezentovali su i predstavnici Centra za međunarodne odnose iz Banja Luke, Beogradskog centra za sigurnosne studije, te Atlantskog savjeta Crne Gore.

Drugog dana 94. Rose – Roth seminara Parlamentarne skupštine Sjevernoatlantskog saveza (PSNATO) i zasjedanja posebne grupe za Bliski istok i Mediteran PSNATO učesnici iz 42 zemlje svijeta u okviru odvojenih sesija diskutovali su o viđenjima u vezi sa članstvom zemalja regiona Zapadnog Balkana u NATO - savezu, iz perspektive struke, kao i iz perspektive Bosne i Hercegovine, te o glavnim političkim pitanjima na Zapadnom Balkanu.

Iznoseći stavove o trenutnoj političkoj situaciji u našoj zemlji, predsjedavajući Doma naroda PSBiH Bariša Čolak istakao je da se Bosna i Hercegovina nalazi pred historijskim izazovom snažnijeg iskoraka prema euroatlantskom integracijama. Naglasio je da to podrazumijeva više demokratije, bolju zaštitu ljudskih prava, izgradnju političke stabilnosti i pravne sigurnosti ili, pak, nastavak stagnacije i autistične politike sukoba i razmirica sa unaprijed nesagledivim poljedicama, ne samo za našu državu nego i mnogo šire.

Čolak je naveo da sve zemlje regije, bez obzira na stežen njihove integracije prema EU, moraju ukazivati na nužnost integracije Jugoistočne Evrope u EU i NATO. Ukazujući na negativne trendove sa kojima se Bosna i Hercegovina susreće, Čolak je naglasio da veliki broj građana i dalje napušta našu zemlju, među kojima dominira mlada generacija naših državljana. Na kraju, ocijenio je da bi, ukoliko tokom ove godine u PSBiH uskoro ne dođe do političkog dogovora po pitanju izmjena Izbornog zakona BiH, naredna izborna 2018. godina mogla biti vrlo turbulentna i problematična. Čolak je zaključio da zvaničnici u našoj zemlji moraju spustiti tenzije i preuzeti odgovornost za izgradnju Bosne i Hercegovine prema mjeri svih naroda i građana koji u njoj žive.

Član delegacije PSBiH u PSNATO Asim Sarajlić podsjetio je prisutne učesnike 94. Rose Roth seminara da trenutnu političku situaciju u Bosni i Hercegovini opterećuju brojni problemi. Izrazio je svoje uvjerenje da postoji izlaz u vezi sa ovim pitanjem, te da se sveukupna situacija u našoj zemlji može popraviti. Sarajlić je zaključio da je dijalog ključna riječ u ovom procesu, te da svi zajedno u Bosni i Hercegovini moramo učiniti u definisanju naše bolje i svjetlije budućnosti.

Govoreći o perspektivama Bosne i Hercegovine u vezi sa njenim članstvom u NATO-u, predsjedavajući Vijeća ministara BiH Denis Zvizdić je naglasio da su mir i stabilnost temeljni i najvažniji prioritet svih građana naše zemlje, te da NATO predstavlja sinonim za stabilnost i prosperitet svih njenih članica. Zvizdić je izrazio svoje očekivanje za značajnijim ubrzanjem procesa EU integracija, a posebno za aktiviranjem Akcionog plana za članstvo (MAP) u NATO-u, što ujedno predstavlja i strateški cilj naše zemlje. Podsjetio je da je prošla godina bila najuspješnija godina za našu zemlju kada je u pitanju njen put ka EU, o čemu najbolje svjedoče posljednja dva godišnja izvještaja Evropske komisije o napretku Bosne i Hercegovine. Zvizdić je pozdravio NATO-vu politiku otvorenih vrata, ocijenivši da ona predstavlja pitanje od velikog značaja za cjelokupan region Zapadnog Balkana. Zaključio je da lično smatra da naša zemlja treba postati članicom Alijanse, te prisutne učesnike Rose Roth seminara pozvao da aktiviraju MAP, jer po ovom pitanju postoji koncenzus u Bosni i Hercegovini.

Učesnicima Seminara obratili su se i predsjednik Narodne skupštine Republike Srpske Nedeljko Čubrilović, predsjedavajući Komiteta za civilnu dimenziju sigurnosti PSNATO Vitalino Canas, a svoja viđenja iz perspektive struke po pitanju reformske agende BiH dao je i zamjenik šefa Delegacije EU u BiH.

Tokom posljednje sesije zasjedanja apostrofirana su glavna politička pitanja na Zapadnom Balkanu, poput odnosa Beograda i Prištine, aktuelnim dešavanjima u Makedoniji, te uključenosti trećih sila u politička dešavanja u zemljama regije.

U okviru sesije na kojoj je razgovarano o nestabilnosti u regionima Bliskog Istoka, Sjeverne Afrike i Zapadnog Balkana, učesnicima se obratio predsjednik PSNATO-a Paolo Alli, koji se zahvalio PSBiH na izvrsnoj suorganizaciji ovog seminara i prijemu koje su predstavnici PSNATO-a iz 42 zemlje svijeta imali u Sarajevu. Alli je naveo da se tokom razgovora sa rukovodstvom oba doma PSBiH uvjerio u čvrstu volju predstavnika institucija vlasti Bosne i Hercegovine da u narednom periodu aktivno rade na reformama i ispunjavanju uslova za nastavak euroatlantskih integracija naše zemlje. Ocijenio je da su parlamentarni dijalog i diplomatija pitanja od krucijalne važnosti, te istakao da razgovori, koji su tokom prethodna tri dana vođeni u Sarajevu, predstavljaju garant stabilnosti u zemljama regiona. Zaključio je da na političkim liderima stoji velika odgovornost u

vezi sa ovim pitanjima, jer građani upravo od njih očekuju rješenja koja će omogućiti bolju ekonomiju i bolje uslove za život svih u regionu Zapadnog Balkana.

Tokom posljednjeg dana zasjedanja sudionicima Rose - Roth seminaru PSNATO-a prezentovan je izvještaj posebne grupe za Mediteran i Bliski Istok, a razgovarano je i o terorističkim izazovima sa kojima se susreću zemlje Evrope i region Zapadnog Balkana. U okviru rasprave o implikacijama koje se odnose na pitanja terorizma i ekstremizma u zemljama regiona, učesnicima seminaru i zasjedanja Posebne grupe za Bliski Istok i Mediteran PSNATO-a obratio se i ministar sigurnosti BiH Dragan Mektić.

Radni dio 94. Rose - Roth seminaru PSNATO-a i zasjedanja Posebne grupe za Bliski Istok i Mediteran PSNATO-a okončan je prezentacijom inicijative za sprečavanje nasilnog ekstremizma u Jugoistočnoj Evropi, a prisutni učesnici upoznati su i sa trenutnom situacijom i statusom boraca iz Evrope na ratištima u Siriji i Iraku i povratnika iz zaraćenih zona.

Završnim obraćanjem predsjedavajućeg Delegacije Parlamentarne skupštine Bosne i Hercegovine (PSBiH) u Parlamentarnoj skupštini Sjevernoatlantskog saveza (PSNATO) Nikole Lovrinovića, 23.3.2017. je u Sarajevu okončan 94. Rose - Roth seminar PSNATO i zasjedanje Posebne grupe za Bliski Istok i Mediteran PSNATO.

Predsjedavajući Lovrinović izrazio je zadovoljstvo činjenicom da je PSBiH prethodna tri dana bila domaćin eminentnog skupa, u čijem je radu učestvovalo preko 150 parlamentaraca iz 19 zemalja NATO-a, 11 zemalja pridruženih članica Alijanse, među kojima je i Bosna i Hercegovina, te 12 država regiona Bliskog Istoka i Sjeverne Afrike. Predstavnicima PSNATO-a Lovrinović se zahvalio na saradnji tokom organizovanja ovog seminaru, te izrazio očekivanje da će diskusije koje su vođene prethodnih dana doprinijeti stabilizaciji političkih i sigurnosnih prilika u zemljama regiona.

Osim toga, dana 22.3. 2017. godine, predsjedavajući oba doma Parlamentarne skupštine Bosne i Hercegovine (PSBiH) Šefik Džaferović i Bariša Čolak, članovi Kolegija Predstavničkog doma Borjana Krišto i Mladen Bosić i član Kolegija Doma naroda PSBiH Safet Softić razgovarali su sa predsjednikom Parlamentarne skupštine NATO-a (PSNATO) Paolom Allijem o daljem toku euroatlantskih integracija Bosne i Hercegovine.

Predsjedavajući PSNATO-a i poslanik u Parlamentu Italije Paolo Alli, koji u Sarajevu učestovao u radu 94. Rose – Roth seminaru u zajedničkoj organizaciji PSNATO-a i PSBiH, zahvalio se najvišim zvaničnicima PSBiH na uspješnoj suorganizaciji seminaru, za kojeg je ocijenio da predstavlja dobru priliku da se otvoreno razgovara o političkim problemima i pitanjima sigurnosti u regionu Zapadnog Balkana, te daje značajan doprinos produblivanju partnerskih odnosa BiH i NATO-a.

Pohvaljujući aktivnost i doprinos Delegacije PSBiH u radu PSNATO-a, gospodin Alli naglasio je da parlamentarci država članica NATO-a snažno podržavaju proces euroatlantskih integracija BiH i smatraju da taj proces ne može biti završen i konačan ukoliko ne obuhvati zemlje Zapadnog Balkana. S tim u vezi, predsjednik PSNATO-a izrazio je spremnost te organizacije da pomogne i podrži institucije BiH u provođenju reformi i naporima da se ubrza put integracija u Evropsku uniju (EU) i NATO.

Članovi kolegija oba doma PSBiHsu istaknuli činjenicu da institucije naše zemlje, usprkos složenoj političkoj situaciji i otežanom djelovanju, rade na ispunjavanju uslova za članstvo u EU i NATO, što su, kako su naglasili, dva ključna vanjskopolitička cilja BiH. S tim u svezi, članovi kolegija oba doma PSBiH podsjetili su i na činjenicu da je Predsjedništvo BiH usvojilo „Pregled odbrane“, te da se provode aktivnosti na knjiženju perspektivne vojne imovine, čime se, kako su rekli, ispunjavaju uslovi za aktiviranje Akcionog plana za članstvo u NATO-u (MAP).

Naglašavajući značaj aktiviranja MAP-a za BiH, članovi rukovodstva PSBiH su istakli i spremnost institucija BiH da, zajedno sa partnerima iz NATO-a, nastave da učestvuju u misijama očuvanja mira, kao i da rade na suzbijanju globalnih problema radikalnog ekstremizma, terorizma i migrantske krize.

Sastanku članova kolegija oba doma PSBiH sa predsjednikom PSNATO-a Paolom Allijem prisustvovao je i predsjedavajući Delegacije PSBiH u PSNATO-a Nikola Lovrinović.

Informaciju sačinio:
sekretar Delegacije
Željko Grubešić

Predsjedavajući Delegacije
Nikola Lovrinović

Dostavljeno:

- naslovu
- a/a